



Comunu de Biddaspitziosa

Provìntzia de Casteddu

Vissinnioria su Sindigu, is Autoridadis, tzitadinas e tzitadinus de Yaonuh, a nòmini miu, de sa Giunta Comunali, de is Consilleris e de sa genti de Biddaspitziosa, si saludu de coru mannu.

Oi est una di' stòriga, chi sa comunidadi mia at a arregordai po sempri, po unu fatu stravanau: s'afradiamentu cun sa bidde de Yaonuh. Po Biddaspitziosa est su primu de sempri.

Dd'apu arregordau cun su pròpiu prexu in sa chistioni chi apu fatu in donnia-santu de su 2008, torrendiddu a nai in s'interbentu pùbrigu de su 2009, candu femus chistionendi de is sordaus italianus giòvunus mortus po sa paxi in Iraq, chi Biddaspitziosa dd'at fatu una pratza e unu monumentu.

Sa di' apu torrau a nai chi s'Aministratzioni Comunali de Biddaspitziosa si iat'essi afradiada intru de pagu tempus cun sa bidde de Yaonuh, in su Libanu de Giossu, innui traballat su contingenti de paxi italianu. Is Fortzas Armadas italianas s'agatant in Libanu de diora, de candu s'Onu ita fatu su contingenti Unifil, ma ant afortiau su traballu insoru, cumentu missioni de umanidadi in s'interessu de sa genti de su Libanu, in is ùrtimus cuatr'annus. Milli e milli sordaus nostus ddoi funt andaus, agiudendi diaderus sa genti cun medas fainas po agiudai a cresci sa sotziedadi, cun s'obra Leone, nàscia po s'arresoluzioni de s'Onu 1701 de su 2006.

A is sordaus italianus, chi funt traballendi de annus in Libanu, ddus apretziaus e ddi torraus gràtzias po su chi funt fendi po sa democratzia e sa paxi, puru ca funt fendi apretziai, po cumentu si portant beni, s'Itàlia in totu su Mundu.

Su Sindigu stimau, narendi cantu siat de importu custu fatu de oi po Biddaspitziosa, aici cumentu po Yaonuh, innantis de totu po s'amigàntzia ma po sa politiga puru, seu cumbintu chi custu at'essi unu primu passu sceti de unu traballu

imparis po sa cuncàmbia de cultura. Seus aparicendi unu caminu mannu po fai cresci imparis is comunidadi nostas.

Oi poneus sa primu pedra de una domu forti e de totus, chi boleus pesai imparis partendi de una fundatzioni manna, teneus abisòngiu de amigàntzia intru de is pòpulus, de paxi, de agiudu, de si acarai, po fai imparis unu mundu melius.

Yaonuh atòbiat Biddaspitziosa: 2300 personas, a pagu tretu de Casteddu, capitali de Sardinnia, sa terra nosta tropu bella. Custas duas bidda podint, mancai piticas po sa demografia, agiudai a fai cresci is arrelatas intru de is pòpulus, fendi unu caminu de connoscèntzia a pari, chi no fait a ndi fai de mancu po sa paxi in su Mesuderràniu nostu, de Obrescidroxxu a Scurigadroxxu.

Giai in sa primu millada de annus innantis de Gesugristu, su pòpulu antigu de Sardinnia teniat arrelatas bonas e cuncàmbia de economia cun su pòpulu antigu de su Libanu, is Fenicius, chi iant apretziau siguru su mari sardu, gràtzias a s'ospitalidadi de is Sardus Nuraxesus, chi podit essi chi cumpartessint sa pròpiu arrèxini de pòpulu, chi cun nosu arribat fintzas a oi.

Mi permitat, su Sindigu, de saludai mellus is piciocus e is piciocas de sa comunidadi sua, po chi potzant essi sa siguresa de unu caminu de paxi e de amigàntzia, po chi is genias noas potzant fai unu sàrtidu de cultura beru chi fetzat acabai is ideas de dominiu e de certu, aici chi a impaerai sa fortza bessat un'arregordu tristu sceti, de circai in is librus de stòria.

Ddi torru gràtzias, su Sindigu stimau, po s'arricida de coru e de amigàntzia, serru cumbidendidda, cumentu at a podi, a benni Vissinnioria a abisitai su Comune miu, po afortiai s'afradiamentu intru de Yaonuh e Biddaspitziosa, po si-ghiri sa cuncàmbia e afortiai s'amigàntzia.

Si imprassu a totus, cun carinniu, a nòmini de sa genti de Biddaspitziosa.

Yaonuh (Libanu), su 22 de martzu de su 2010.

Elio Mameli,

Sindigu de Biddaspitziosa